

Mir kenne nimmi keeschele ...

Vor e paar Daach habb isch uff de Strooß moin Kummbeer Schorsch getroffe unn mir hawwe e bissi iwwer alles Meeschliche geschwätzt.

Uff oomol seeder: Du Honnes, merr solls nitt glaawe, awver moi Kättche will dissjohr bei unserm Keeschelklub ess ersde Mol enn Vordraach mache.

Ah ja, saach isch, wonn willse den donn zum Beste gewwe?

Seet de Schorsch: Mir mache die iwwernächst Woch enn Fassenachtsowend unn doodebei willses mache. Glaab merr, isch bin fruh, wenn dess emol vorbei iss, weil in jeder Stubb hoddse enn Zeddel leie unn wennere was oifalle dut, schreibtse gleisch uff.

Willse den Vordraach in flerschemerisch odder in hochdeitsch mache unn willse den aach in Reime mache?, habb isch gefroochd, weil dess iss joo nitt su oofach.

De Schorsch druff: Nodierlisch willse den in flerschemerisch unn in Reime mache. Dess iss joo grad de Zeddelkrom, vunn dem isch geredd habb, weilse allsfort dennoch sucht, was sich uff e onner Wort reime dut.

Unn was hottse ferr e Thema?, habb isch gefroochd.

Ei was unseroonter ewe omm meisde beschäfdige dut, unser Alder, seet de Schorsch, unn was mir ferrn Spass noch hawwe unn was merr noch unn nimmi unner nemme kenne, awver aach die gons Sach mett dene Dokdern, die merr brauch. Weil joo in unsern Keeschelklub koo Fraa unn koon Monn mieh keeschele konn, weil merr uns all nimmi bigge kenne beim Werrfe.

Isch habb meddem Kobb gewaggeld: Su ebbes werrd doch ewe iwverall gebrochd, doo muss sichs Kättche schunn ebbes Besonneres oifalle losse.

Isch glaab, dess hottse aach, dut de Schorsch ze Antwort gewwe. Unn donn soll ess su soi, dass zwischedorsch immer enn Refrain kimmt, wo all sesomme mettsinge kenne.

Dess heert sich gut oo, saach isch, wenn die Leit mettmache kenne bleiwese aach wach unn schloofe nitt oi. Saach emol, konnsde merr schunn emol verrode, e bissi was, wie sich der Vordraach ooheern dut?

Ja, seet de Schorsch, bass emol uff, ebbes habb isch merr gemerkt:

Mir Alde hawwes gut
mir dunke unser Schnud
wer immer was ze feiern hott
doo gieh merr hie unn nimmi fort
bis dasses letzte Glas geleert
unn die Stubb werrd ausgekehrt.

Unn jetz kimmt de Refrain - unn de Schorsch hott gesunge:

Mir kenne nimmi keeschele,
mir kenne nimmi seeschele,
mir kenne nor noch ...

Isch ruf: Halt, Schorsch. Saach emol, hott ooner vunn eich geseescheld?

Naa, seet de Schorsch, awver dess dut sich doch su schee reime, odder?

Schorsch, saach isch, saach doim Kättche, sie soll sich ebbes onnersders oifalle losse, weil wenn de gonse Klub dess oomol gesunge hott, heeßts beim nächsde Refrain su:

Mir kenne nimmi keeschele,
mir kenne nimmi vee...

Um Gotteswille, kreischt de Schorsch, dess singe merr nitt. Weil die Fassenacht muss
sauwer bleiwe, dess hott vor Johrn schunn de Jochen Kunz gesaad. Eiern Honnes